

EL LIBER DEL MOND

**Cosa vnive a rompme i tapari
Con d'bei test e d'bei precet?
Per d'sentense filosofiche
Fina Orcorte a n'a d' vaset.
Sui barbis d' Platon e d' Seneca
Giù da si j'eu sempre vdù
Sgambitè dsour na gran sotola
Na gran rassa d' foi-foutù.**

**Chi pi savi che Aristotile?
Pi eloquent che Ciceron?
Ma lodand le rave e i brècoli
A mangiavo d' sturion.
A fasio Timon e Diogene
I filosof patanù,
• Ma tra 'l cinich e 'l misantropo
J'era 'l porch e 'l fol-foutù.**

Deurve mach la prima pagina
D'coul gràn liber ambroujà,
Che ans' la terra e che ans l'oceano
Domne Dei a la stampà :
Pi lo garde, pi lo medite,
Pi lo volte 'n su e 'n giù,
Pi v'acorse d' esse d'racole,
Pi v'conosse d' foi-foutù.

Da una part i'-vedde d'nuvole
D' pciti popol, d' pciti re,
Ch' as ciapulo, cb'a s'anicbilo,
E saveissne almanch perchè!
El furour as ciama gloria,
El delit as dis virtù,
E l'onour a pianta fabrica
Da bindei pr' i foi-foutù.

Con un'aria diplomatica
Guardè coui del portafœui
Con la saussa dla politica
A fè 'l balsam d'ogni ambreui.
L'onestà, la fede pubblica
L'an vendue al feramiù,
E a distilo 'l ben dla patria
Al lambich di foi-foutù.

Gran maestri d' sèrimonie,
 Gran scodè, gran ciamberlan,
 Coui dla crous ch' a smia n' etcetera,
 Coui dla ciav sul fabrian,
 Gent ch' mangriò la polpa e 'l scheletro
 D' Padre Eterno bel-e-crù,
 Gent ch' a vivo, angrasso e prospero
 Del sudour di foi-foutù.

Con la boeta dle fandonie
 Ch' a smaltisso ai pè d' l' altar
 Coui dla stola, coui dla mitria
 Fan del trèno i paracar:
 Per doui sold leur a santifico
 Fina i corni d' Belzebù,
 E a na fan una reliquia
 Ch' a berlico i foi-foutù.

Con la toga fodrà d' proroghe,
 Con la pruca angavgnà d' test,
 Guardè là j' eroi del codice,
 J' Alessandri del Digest:
 Con el peis d' Ulpian e d' Bartolo
 Leur a vendo al gross e al mnù;
 E a dispenso la giustissia
 Tant al rub ai foi-foutù.

Guardè là sucrand le pillote
Con el sugh d'quaich bel discours
Coui ch'a mostro 'l ppass dla pecora
Per stermè le grinfe dl'ours :
Che pr'un titot, pr'una carica
A fario l'erbo forchù,
Che con d'pleuje da Temistocli
A son sciume d'foi-foutù.

A la mort o povri bipedi,
Voi ch'i marcie è grand e picit
Del gran viage sul convoglio
Guardè si lo ch'a j'è scrit :
» Da Turin a Filadelfia,
» D'ant l'Ègit ant el Perù,
» Coust bel mond a l'è un seraglio
» D' ciarlatan e d'foi-foutù.

Nelle carceri correzionali

22 aprile 1831.